

HIMNI AKATHIST
“Përshëndetjet”
drejtuar Hyjlindëses së Përbikulluar Mari
(së bashku me Pasdarkën e Vogël)

Botim i Kishës Orthodhokse Autoqefale të Shqipërisë
Tiranë, 2003

Prifti: I bekuar është Perëndia ynë, gjithnjë, tani e përherë e në jetë të jetëve.

Lexuesi: Amin.

Prifti: Lavdi më Ty, o Krisht Perëndia ynë, lavdi më Ty.

O Mbret qiellor, Ngushëllimtar, Shpirti i së vërtetës, që ndodhesh kudo dhe i mbush të gjitha, thesari i të mirave dhe dhurues jete; eja dhe qëndro ndër ne, dhe pastrona nga çdo njollë, dhe shpëto, o i Mirë, shpirtrat tanë.

Lexuesi: Amin.

Shenjt Perëndi, Shenjt i fuqishëm, Shenjt i pavdekshëm, mëshirona (3 herë).

Lavdi Atit e Birit edhe Shpirtit të Shenjtë; tani e përherë e në jetë të jetëve. Amin.

Trini e Tërëshenjtë, mëshirona; o Zot, fali mëkatet tona; o Zot i madh, ndjei paudhësitë tona; o i Shenjtë, vështro dhe shëro sëmudjet tona për emrin tënd.

Mëshiro, o Zot (3 herë).

Lavdi Atit e Birit edhe Shpirtit të Shenjtë; tani e përherë e në jetë të jetëve. Amin.

Ati ynë që je në qiejt, u shenjtëroftë emri yt, ardhhtë mbretëria jote, u bëftë dëshira jote, si në qiell ashtu edhe mbi dhe. Bukën tonë të përditshme jepna neve sot; dhe falna fajet tona sikurse edhe ne ua falim fajtorëve tanë; dhe mos na shtjer në ngasje, po shpëtona nga i ligu.

Prifti: Se jotja është mbretëria, dhe fuqia, dhe lavdia e Atit, e Birit dhe e Shpirtit të Shenjtë, tani e përherë e në jetë të jetëve.

Lexuesi: Amin.

Mëshiro, o Zot (12 herë).

Ejani t'i falemi e t'i biem ndër këmbë Mbretit,
Perëndisë tonë.

Ejani t'i falemi e t'i biem ndër këmbë Krishtit,
Mbretit, Perëndisë tonë.

Ejani t'i falemi e t'i biem ndër këmbë vetë Krishtit,
Mbretit e Perëndisë tonë.

Psalmi 50

Përdëllemë, o Perëndi, sipas përdëllimit tënd të
madh dhe sipas dhembshurive të tua të shumta
shuaje paudhësinë time.

Lamë krejt prej paudhësisë sime dhe pastromë
prej mëkatit tim.

Se unë e njoh paudhësinë time dhe mëkati im
është përpara meje kurdoherë.

Te ti vetëm mëkatova dhe të keqen e bëra përpara
teje, kështu që ti je i drejtë në fjalët e tua dhe i
kthjellët në gjykimin tënd.

Se ja tek u zura në paudhësi, dhe në mëkate më
lindi nëna ime.

Se ja tek deshe të vërtetën, të patreguarat dhe të
fshehtat e urtësisë sate m'i tregove.

Spërkatmë me hisop dhe do të pastrohëm, lamë
dhe do të bëhem më i bardhë se dëbora.

Bëmë të dëgjoj gëzim e ngazëllim dhe do të më gëzohen eshtrat e dobësuar.

Ktheje fytyrën tënde nga mëkatet e mia dhe shuaji gjithë paudhësitë e mia:

Krijë zemër të pastër tek unë, o Perëndi, dhe përtëri frymë të drejtë në thellësitë e zemrës sime.

Mos më hidh larg prej fytyrës sate dhe mos e hiq prej meje Shpirtin tënd të Shenjtë.

Jepma prapë ngazëllimin e shpëtimit tënd dhe forcomë me frymë sunduese.

Do t'u mësoj të paligjive udhët e tua dhe të pabesët do të kthehen tek ti.

Shpëtomë prej gjakrash, o Perëndi, Perëndia i shpëtimit tim, gjuha ime do të lavdërojë me gëzim drejtësinë tënde.

O Zot, çel buzët e mia dhe goja ime do të lëçitë lavdinë tënde.

Se po të kishe dashur therore do të kisha prurë, por ty s'të pëlqejnë therore me djegie të plotë.

Therore ndaj Perëndisë është shpirti i dërrmuar; zemrën e dërrmuar dhe të përulur Perëndia nuk do ta përbuzë.

Bëji të mirë, o Zot, Sionit sipas mirëdashjes sate dhe le të ndërtohen muret e Jerusalemit.

Atëherë do të të pëlqejnë therore drejtësie, dhurata dhe therore me djegie të plotë.

Atëherë do të sjellin viça mbi altarin tënd.

Psalmi 69

O Perëndi, ndihmës sime vëri re, o Zot, shpejto të më ndihmosh.

U marrofshin e u turpërofshin ata që shpirtin tim kërkojnë;

Shpatullat kthefshin me turp dhe u mbulofshin ata që të keqen time duan.

Mbrapsht u kthefshin menjëherë të turpëruar ata që më thonë: Të lumtë, të lumtë!

U ngazëllofshin e u dëfrefshin në ty të gjithë ata që të kërkojnë, o Perëndi, dhe ata që duan shpëtim prej teje, thënshin përgjithnjë: U madhëroftë Zoti!

Dhe unë jam i varfër e nevojtar; o Perëndi, ndihmomë. Ti je ndihmësi im dhe çlirimtari im, o Zot; mos u vono.

Psalmi 142

O Zot, dëgjo faljen time, vëri veshin lutjes sime sipas së vërtetës sate, dëgjomë sipas drejtësisë sate.

Dhe mos hyr në gjyq me shërbëtorin tënd, se asnjë i gjallë nuk do të dalë i drejtë përpara teje.

Se armiku ma ndoqi shpirtin dhe ma rrëzoi jetën përdhe.

Më vuri në vende të errëta, si të vdekurit prej kohe, shpirti m'u trishtua dhe zemra m'u trondit.

Kujtova ditët e lashta, mendova gjithë veprat e tua, sillja ndër mend punët e duarve të tua.

I shtriva duart drejt teje; shpirti im ka etje për ty si toka e thatë.

Dëgjomë shpejt, o Zot, m'u zu fryma, mos e kthe mënjanë fytyrën tënde prej meje, që të mos bëhem si ata që zbritën në varr.

Bëmë që të dëgjoj përdëllimin tënd në mëngjes se tek ty shpresova.

Tregomë, o Zot, udhën ku duhet të eci, se tek ty e kam varur shpirtin.

Shpëtomë prej armiqve të mi, o Zot, se tek ti kërkova strehë.

Mësomë të bëj vullnetin tënd se ti je Perëndia im.

Fryma jote e mirë do të më udhëheqë në vend të drejtë, për emrin tënd, o Zot, gjallëromë.

Sipas drejtësisë sate nxirr shpirtin tim nga trishtimi, dhe sipas mëshirës sate shfarosi armiqtë e mi, dhe shkatërroi të gjithë ata që hidhërojnë shpirtin tim se unë jam shërbëtori yt.

Dhoksologjia e Vogël

Lavdi Perëndisë në më të larta dhe mbi dhenë paqe dhe mbi njerëzit mirëdashje.

Të himnojmë, të bekojmë, të falemi, të lavdërojmë, ty të falënderojmë për lavdinë tënde të madhe.

Zot Mbret, Perëndi qiellor, At i tërëfuqishëm. Zot Bir i vetëmlindur Jisu Krisht, edhe Shpirti i Shenjtë.

Zot Perëndi, qengj i Perëndisë, Bir i Atit që ngre mëkatën e botës; mëshirona, ti që ngre mëkatet e botës.

Prano lutjen tonë, ti që rri në të djathtë të Atit, edhe mëshirona.

Se ti je shenjt i vetëm, ti je Zot i vetëm, Jisu Krisht, për lavdi të Perëndisë Atit. Amin.

Për çdo mbrëmje do të të bekoj, dhe do të lavdëroj emrin tënd për jetë e në jetë të jetës.

O Zot, u bëre streha jonë brez pas brezi, unë thashë: a Zot mëshiromë, shëro shpirtin tim se fajtova tek ti.

O Zot, tek ti gjeta strehë, mësomë të bëj dëshirën tënde se ti je Perëndia im.

Se pranë teje është burimi i jetës; me dritën tënde do të shohim dritë.

Zgjate përdëllimin tënd mbi ata që të njohin.

Bëna të denjë, o Zot, që të ruhemi këtë natë pa ndonjë mëkat.

I bekuar je, o Zot, Perëndi i Etërve tanë, dhe emri yt është i himnuar dhe i lavdëruar në jetët. Amin.

Le të jetë, o Zot, përdëllimi yt mbi ne, sikurse kemi shpresuar tek ti.

I bekuar je, o Zot, mësomë porositë e tua.

I bekuar je, o Zot, bëmë të mençëm në porositë e tua.

I bekuar je, o i Shenjtë, ndriçomë me porosinë e tua.

O Zot, mëshira jote është për jetë, mos i hiq sytë nga veprat e duarve të tua.

Ty të ka hije lavdërimi, ty të ka hije himni, ty të ka hije lavdia, Atit e Birit edhe Shpirtit të Shenjtë, tani e përherë e në jetë të jetëve. Amin.

Simboli i Besimit

Besoj në një Perëndi, Atë të tërëfuqishëm, krijues të qiellit edhe të dheut dhe të gjithë të dukurave dhe të padukurave.

Dhe në një Zot, Jisu Krishtin, Birin e Perëndisë, të vetëmlindurin, që lindi prej Atit përpara gjithë shekujve. Dritë prej drite, Perëndi të vërtetë prej Perëndie të vërtetë, të lindur, jo të bërë, që ka të qenët një me Atin, me anën e të cilit u bënë të gjitha.

Që për ne njerëzit dhe për shpëtimin tonë, zbriti prej qiejve dhe u trupëzua prej Shpirtit të Shenjtë dhe Virgjëreshës Mari dhe u bë njeri.

Dhe u kryqëzua për ne në kohën e Pontit Pilat, dhe pësoi e u varros.

Dhe u ngjall të tretën ditë sipas shkrimeve.

Dhe u ngjijt në qiejt dhe rri në të djathtë të Atit.

Dhe do të vijë përsëri me lavdi të gjykojë të gjallët dhe të vdekurit, mbretëria e të cilit nuk do të ketë mbarim.

Dhe në Shpirtin e Shenjtë, Zot, Jetëbërës, që buron prej Atit, që adhurohet e lavdërohet bashkë me Atin e me Birin, që foli me anën e profetëve.

Në një Kishë të shenjtë, katolike dhe apostolike.

Pohoj një pagëzim për ndjesën e mëkateve.

Pres ngjalljen e të vdekurve.

Dhe jetën e ardhshme të amëshuar. Amin.

Të meriton me të vërtetë të të lumturojmë, Ty Hyjlindësen, gjithmonë të lumturën dhe të përmbikulluarën dhe Mëmën e Perëndisë tonë. Më të nderuarën se Keruvimet dhe më të lavdëruarën pa krahasim se Serafimet, që pa u cënuar linde Fjalën Perëndi, me të vërtetë Hyjlindësen, Ty të madhërojmë.

Psaltët këndojnë:

Tingulli T. IV. E vetëzëshme - To Prostakthen.

Si mori vesh porosinë e misterhme, vajti te tenda e Josifit i nxituar Kryeengjëlli t'i thotë Virgjëreshës: Ai i cili qiejt përkuli kur zbriti këtu, mbahet i tëri pa ndryshuar fare tek Ti, që si e shoh në pëqirin tënd të marrë formë robi, çuditëm edhe të thërres: Gëzohu, o Nuse e panusëruar.

Psaltët kanonin e mëposhtëm

Kanoni i Akathistit. Krijim i Josif Himnografit
Tingull IV

ODE I. Anikso To Stoma Mu

Irmosi

Ja gojën e çel tani, i frymëzuar prej Shpirtit të Shenjt', dhe këngë do t'i këndoj Nënës së Madhe mbi fron, dhe do ta kremtoj me valle buzëqeshur, me zë do t'i shpall kudo, gjithë çudit'e saj. (2 herë)

Troparet

E përmbishenjtë Hyjlindëse shpëtona.

Si libër të Zotit Krisht, të hirësuar prej Shpirtit të Shenjt', të pa Kryeengjëlli, Mari Hyjlindëse, dhe të tha kështu: Lum ti që sjell gëzimin; mallkimin stërgjyshëror, ti do ta zhdukësh krejt.

E përmbishenjtë Hyjlindëse shpëtona.

Adamin e ngrite lart, o Virgjëreshë Hyjlindëse, dhe Ferrin e shtrin përdhe, o Zonj' e Shenjtë Mari, lum ti, o pallat i Zotit edhe Mbretit, lum ti, o i zjarriti fron i perandorit Krisht.

Lavdi Atit e Birit edhe Shpirtit të Shenjtë.

Gëzohu, o lindëse e të pafishkurit trëndafil, gëzohu, se ti po rrit mollën e herëshme, lule e qellëshme e Zotit edhe Mbretit, lum ti, o Hyjlindëse, zonjë shpëtonjëse.

Tani e përherë e në jetë të jetëve. Amin.

Thesar i virtyteve, që na ke ngritur prej varreve, edhe prej kufomave, Zonjë Hyjlindëse, lule dhe zambak, aromë për besnikët, temjan i mirerëshmë, mir' e paçmuarshme.

ODE III. Tus Sus Immologus

Irmosi

O Zonjë dhe Nën' e Perëndisë, burim i paso-sur jetësor, ti siguroi gjith' ata, që të këndojnë plot me zell, dhe lart në qell ku mbretëron, kurorëzoji me çdo lavdi. (2 herë)

Troparet

E përmbishenjtë Hyjlindëse shpëtona.

Kallinë qiellor ti na ke mbirë, si arë pa buj' dhe pa lërim, lum ti altar i shpirtëshmë, ku buk' e jetës na u vu, lum ti burim i ujëve, që japin jetë Hyjlindëse.

E përmbishenjtë Hyjlindëse shpëtona.

Mëshqerrë që demin na ke lindur, qellor për besnikët pa cënim, lum ti o del' e hyjëshme, se qengjin Perëndi na dhe, mëkatin botëror që ngre, gëzohu Zonjë ndërmjetëse.

Laodi Atit e Birit edhe Shpirtit të Shenjtë.

Gëzohu mëngjes i ditës sonë, që Diellin solle Jisu Krisht, për botën dritë dhe për ne, dhe errësirë s'le mbi dhe, dhe Ferrin e demonëve, e shkatërrove për gjithënjë.

Tani e përherë e në jetë të jetëve. Amin.

Gëzohu o derë shpëtimtare ku Fjala dhe Bir, i vetëm shkoj, Ferrit ia theve dyertë, me lindjen e çlironjësit, gëzohu port' e hyjëshme, dhe shpëtimtare e ndritëshme.

ODE IV. O Kathimenos En Dhoksi

Irmosi

Ti që rri midis lavdisë, përmbi fronin e hyjëshme, nga një re e lehtë, ardhe o Jisu i përjetëshëm, dhe na shpëtove me dorën jetëdhënëse, të thërresim pra: Nder dhe lavdi gjithënjë mbi ty. *(2 herë)*

Troparet

E përmbishenjtë Hyjlindëse shpëtona.

Me këndime dhe me besë, të thërresim Hyjlindëse, lum ti mal i Shenjtë, që u hijesove prej Shpirtit t'Shenjt', lum ti kandil edhe shtambë manaprrurëse, që i ëmbëlson ndjenjat e gjithë besnikëve.

E përmbishenjtë Hyjlindëse shpëtona.

Mëshironjëse e botës, Virgjëreshë Hyjlindëse, lum ti shkall e shenjtë, që nga dheu shpie në qell me hir, lum ti, o urë që prier lavdëronjësit, që prej varreve, lart në Parajsën e engjëjve.

E përmbishenjtë Hyjlindëse shpëtona.

Më e lartë prej çdo qelli, Shpëtimtarin e njerëzve, ti në gjin' e shenjtë, e ke mbajtur Zonjë Hyjlindëse, lum ti që ngjeve me gjakun rrobën ndritëse, dhe shkëlqenjëse, të Komandantit të Forcave.

Lavdi Atit e Birit edhe Shpirtit të Shenjtë.

Ligjvënësin ke lindur, Virgjëreshë Hyjlindëse, që paligjësitë, ua fal të gjithëve darovisht; o lartësi pa kufi, o thellësi pa fund, ndërmjetonjëse, ti na ke ngritur në qiellin.

Tani e përherë e në jetë të jetëve. Amin.

Ty që mplekse për njerinë një kurorë të qiellshme, ty të përhimnojmë, lum ti Virgjëreshë Hyjlindëse, lum ti fortesë dhe mbrojtje e të gjithëve, o përkrahëse, streh' e përikj' e besnikëve.

ODE V. Eksesti Ta Simbanta

Irmosi

Të gjith' i habite ti, me një çudi dhe një lavdi: Ti, o Virgjëresh' e pamartuar, Zotin e botës që mbretëron lart në qell, si një bir e mbajte në pëqi, dhe shpëtim që lartazi u dhurove besnikëve. *(2 herë)*

Troparet

E përmbishenjtë Hyjlindëse shpëtona.

O Zonjë Hyjlindëse, që linde udhëheqësin, ti na ke shpëtuar nga përmytja ne mëkatarët dhe të pavyerit, Nus' e Perëndisë Shën Mari, lum ti, o Hyjpritëse, Nën' e Zotit të gjithave.

E përmbishenjtë Hyjlindëse shpëtona.

Kështjella e njerëzve, gëzohu, o Hyjlindëse, vend' i shenjtërimin dhe lavdisë, vdekja e Ferrit o Nus' e ndritëshme, o gëzim i engjëjve në qell, lum ti, o përkrahëse e të gjithë besnikëve.

E përmbishenjtë Hyjlindëse shpëtona.

O fron që shkëlqen dhe ndrit me Fjalën e përjetëshme, lum ti, o Parajsë shpirtërore, që ke në qendër Zotin e jetëve, që i ëmbëlson edhe i ngjall gjithë të gëzuarit me kungatën e qellëshme.

Laodi Atit e Birit edhe Shpirtit të Shenjtë.

Prej teje forcohemi, thërresim pra me zë të madh: Lum ti, o qytet i Mbretit tonë, e lavdëruar prej gjithë brezave dhe prej gjithë kishave kudo, mal i lartë gjer në qell, det pa fund edhe pa kufi.

Tani e përherë e në jetë të jetëve. Amin.

Pallat i diamanteve të çmuar, o Hyjlindëse, ti që na dhuron margaritarin, Fjalën e Atit dhe Shpëtimtarin ton' Krisht, ti me Perëndinë i pajton gjithë lumëronjësit, që të lusin besnikërisht.

ODE VI. Tin Thian Taftin

Irmosi

Këtë të kremte e lusim sot, për Zonjën edhe Nënë Hyjlindëse, gjithë hyjmëndësit; eni trokisni pra duartë, dhe lavdëroni Zotin që lindi prej asaj. (2 *herë*)

Troparet

E përmbishenjtë Hyjlindëse shpëtona.

Banes' e Fjalës, e ndritëshme, gëzohu shenjtërim i të gjithëve, Zonjë Hyjlindëse, mburrur prej gjithë Profetëve dhe prej të gjith' Apostujve dhe Shenjtorëve.

E përmbishenjtë Hyjlindëse shpëtona.

Na prure vesën e qiellshme, që shoji tërë zjarrin pagan të keq: Ty të thërresim pra: Lum ti, o lesi i vesëve që Gjedeoni e pa, Zonjë Hyjlindëse.

Laodi Atit e Birit edhe Shpirtit të Shenjtë.

Gëzohu Zonjë Hyjlindëse, liman u bëj për ne lundëronjësit, ku të përmblihdhemi brenda në detin e helmeve dhe të përballim sulmet e të paudhëve.

Tani e përherë e në jetë të jetëve. Amin.

Gëzona Zonjë gëzonjëse, mendimet që të themi me zë të madh: Lum ti Hyjlindëse, re edhe ferrë e ndritëshme, që ne besnikët na mbron dhe na mbulon gjithnjë.

ODE VII. *Uk Elatrefsan*

Irmosi

Nuk u faleshin krijesave hyjmenësit, po Kryetarit lart, dhe kërcënimin me zjarr e shkelën, me trimëri, psalnin me brohori: Zot lavdi më ty, o Perëndi i Etërve, ti je vetëm i bekuar. (2 herë)

Troparet

E përmbishenjtë Hyjlindëse shpëtona.

O Hyjlindëse, gëzohu fron i shpirtëshmë, o vreshtë plot hardhi, ngarkuar me rrush të kuq, zambak i pafishkur krejt, që lulëzon, o Zonj', pra gëzohu ti, që shpirtet e besnikëve, i gëzon me gjak të Krishtit.

E përmbishenjtë Hyjlindëse shpëtona.

Ti që linde mjek, shëronjës të besnikëve, Mari Hyjlindëse, o shkop i shenjtë mistik, që lulen e qiellshme ti lulëzon tani, Zonj' e ndritëshme, me gaz prej teje mbushemi, edhe jetë trashëgojmë.

E përmbishenjtë Hyjlindëse shpëtona.

Asnjë gjuhë s'mund, të lavdërojë vlerësisht, ty, o Hyjlindëse; nga Serafimet më lart u ngrite kur linde

ti Mbretin Jisu Shpëtimtar; pra atij iu lut të na shpëtojë gjithënjë, sa të lusim plot me besë.

Lavdi Atit e Birit edhe Shpirtit të Shenjtë.

Prej gjith' anëve, të lumërojm' Hyjlindëse, me thirrje gjithënjë. Gëzohu, o Shën Mari, që mban në pëqirin tënd Fjalën dhe Zotin Krisht; pra atij iu lut, në librin e të gjallëve të na shkruajë, o Zonjë.

Tani e përherë e në jetë të jetëve. Amin.

Ty të lutemi të gjithë dhe përgunjemi me gjithë zemër e shpirt; dëgjona pra Shën Mari, shpëtona prej helmeve, se po përmbysemi, edhe ruaje qytetin tënd Hyjlindëse, prej armiqve të pabesë.

ODE VIII. Pedhas Evagjis En Ti Kamino

Irmosi

Djemat e dënuar për t'u djegur, prej zjarrit i ka shpëtuar lindj' e Zotit Krisht, si simbol në vjetëri dhe si një veprim tani, dhe tërë botën po e mbledh për këng' e lavdërim: Himnojeni ju veprat e Zotit dhe e lartësoni përmbi të gjithë jetët. (2 herë)

Troparet

E përmbishenjtë Hyjlindëse shpëtona.

Fjalën Jisu Krisht në krah' e prite, atë që mban gjithësinë ti e mban në gji, ti me qumësht e ushqen, Zotin dhe ushqenjësin, e dheut dhe të qiellit dhe të këndonjësve: Himnojeni ju veprat e Zotit, dhe e lartësoni përmbi të gjithë jetët.

E përmbishenjtë Hyjlindëse shpëtona.

Ferrën e nxoniti Moisiu, dhe lindjen e Virgjëreshës na e mori vesh. Shëmbëlla e djemave, na e shfaqti qartazi: Në mes të zjarrit hidheshin edhe nuk digjeshin, Hyjlindëse Mari Virgjëreshë; ty pra të himnojmë përherë dhe përjetë.

E përmbishenjtë Hyjlindëse shpëtona.

Grackat e demonëve na zhveshën, po ti përsëri stolin e re na veshe ne, kur na linde Zotin Krisht, edhe të verbuarit, nga hija e mëkateve e panë Diellin, Hyjlindëse banesa e dritës, ty pra të himnojmë përherë dhe përjetë.

Lavdi Atit e Birit edhe Shpirtit të Shenjtë.

Ngjallen dhe të vdekurit prej teje, se jetën dhe jetëdhënësin e linde ti, flasin gjuhëlidhurit, shohin të verbuarit, shërohen të lebrosurit dhe të lënguarit, dhe zhduken krejt nga drita demonët, Zonjë Virgjëreshë shpëtim i njerëzisë.

Tani e përherë e në jetë të jetëve. Amin.

Ti që na dhurove Shpëtimtarin, dhe ti që na lartësove gjer në qiellin, lum ti, o Hyjlindëse, rojtëse shpëtonjëse, se ti i mbron dhe i bekon gjithë këndonjësit: Himnojeni ju veprat e Zotit, dhe e lartësoni përherë dhe përjetë.

ODE IX. Apas Gjigjenis

Irmosi

Gjithë njerëzit, kërcenin me ngazëllim, tek drit' e Shpirtit Shenjt, eni lavdërojeni, engjëj në qiell eni kremtojeni, këtë të shenjtë panair të Kryezonjës Mari, dhe thërrisni: Ti je më e lumura, Virgjëresh' e kulluar Hyjlindëse. (*2 herë*)

Troparet

E përmbishenjtë Hyjlindëse shpëtona.

Çdo besnik thërret: Gëzohu Hyjlindëse, se gjithënjë na jep, gaz që fare nuk mbaron, ti pra shpëtona prej gjithë ngasjeve, nga sulmet e barbarëve dhe gjithë plagëve, që na vijnë, nga shumic' e fajeve, dhe mëkateve tona të tmerrëshme.

E përmbishenjtë Hyjlindëse shpëtona.

Ardhe për ndriçim, për mbrojtje dhe për shpëtim,
pra të thërresim sot: Lum o yll pa perëndim, që sjell
në botë Jisunë diellin; lum o hapëse e mbretërisë,
kollon' e zjarrt' shumë' e fort', që u shpie njerëzve një
jet' të re, qiellore e që kurrë nuk ka mbarim.

E përmbishenjtë Hyjlindëse shpëtona.

Eni besërisht, në Kishën e Zotit Krisht, dhe
përshëndosheni, Nënë dhe Hyjlindësen: O
Virgjëreshë Zonj' e të gjithëve, lum ti më e bekuara
në mes të grave mbi dhé, lum ti lule, miron e
përbotëshme, ti e prite në gjirin dhe na e dhe.

Laodi Atit e Birit edhe Shpirtit të Shenjtë.

Lum ti, o pëllumb, se ti mëshironjësin, na prure
përmbi dhé, mburrj' e Oshënarëve, edhe kurora e
Athloforëve, dhe e Dëshmorëve dhe e Shenjtorëve,
zbukurimi i gjith' të krishterëve, dhe shpëtimi i gjithë
besnikëve.

Tani e përherë e në jetë të jetëve. Amin.

Zot dhe Perëndi, kursë trashëgimin tënd, falu
besnikëve, ndjesën e mëkateve, dëgjoja lutjet Nënës
Hyjlindëse, dhe ndërmjetimet pa pushim për gjithë
njerëzit, dhe shpëtoji, sipas përdëllimit tënd, edhe
falna Parajsën e qiellit.

Tingull T. IV. E vetëzëshme - Ti Ipermako

Përlufteshës gjenerale këngët mundëse, si përhirim që e shpëtove prej tmerreve, qyteti yt po të përshkruan, o Virgjëreshë. Po sikurse ke fuqi të paluftuarshme, prej çfarëdo rreziku shpëtomë, se po të thërres: Gëzohu, o Nuse e panusëruar.

Gjatë katër të premtëve të para të Kreshmës së Madhe, prifti këndon nga një stancë të "Përshëndetjeve", ndërsa të premtën e pestë lexohen të gjitha, përpara ikonës së Tërëshenjtës Mari, në mes të kishës:

STANCA E PARË

Engjëlli kryetar u dërgua nga qielli t'i thotë Hyjlindëses: Gëzohu (*3 herë*); dhe duke të parë të trupëzohesh, o Zot, bashkë me zërin engjëllor, çuditej e qëndronte duke i thirrur asaj kështu:

Gëzohu ti, me anën e së cilës do të shkëlqejë gazi; gëzohu ti, me anën e së cilës do të humbasë mallkimi.

Gëzohu, o rithirrje e Adamit të rënë; gëzohu, o shpërblim i lotëve të Evës.

Gëzohu, o lartësi, ku mendjet njerëzore nuk arrijnë të ngjiten dot; gëzohu, o thellësi, ku dhe sytë engjëllorë e kanë të vështirë të shikojnë.

Gëzohu, se ti je froni i Mbretit; gëzohu, se ti mban atë që i mban të gjitha.

Gëzohu, o yll, që tregon diellin; gëzohu, o bark që trupëzon hyjninë.

Gëzohu ti, me anën e së cilës përtërihet krijesa; gëzohu ti, me anën e së cilës foshnjëzohet Krijuesi.

Gëzohu, o Nuse e panusëruar.

Psaltët: Gëzohu, o Nuse e panusëruar.

Duke parë e Shenjta veten e saj të kulluar, i thotë Gabrielit me guxim: Lajmi i çuditshëm i duket shpirtit tim i pabesueshëm; se, si flet për shtatëzëni nga një ngjizje e pafarshme? Edhe thërret:

Alilua.

Psaltët: Alilua

Duke dashur të njohë të panjohurën, Virgjëresha i thirri meshtarit: Si mund të lindet një bir prej gjiri të kulluar? Thuamë. Dhe ai i tha asaj me frikë, duke thirrur kështu:

Gëzohu, o njohëse e misterit të vullnetit të fshehtë; gëzohu, o besim i heshtjes së atyre që falen.

Gëzohu, o preludi i mrekullive të Krishtit; gëzohu, o kreu i doktrinave të Tij.

Gëzohu, o shkallë qiellore, me anën e së cilës zbriti Perëndia; gëzohu, o urë që çon njerëzit nga toka në qiell.

Gëzohu, o çudi e famshme e engjëjve; gëzohu o plagë e shumëvajtueshme e demonëve.

Gëzohu ti, që në mënyrë të patreguar linde dritën; gëzohu ti, që nuk i the askujt se si.

Gëzohu ti, që kapërcen dijen e të urtëve; gëzohu ti, që ndriçon mendjet e besimtarëve.

Gëzohu, o Nuse e panusëruar.

Psaltët: Gëzohu, o Nuse e panusëruar.

Fuqia e të Shumëlartit e hijesoi atëherë të Pamartuarën që të ngjizet dhe barkun e saj të frytshëm, si arë ua tregoi të gjithë atyre që duan të korrin shpëtim, duke psalur kështu:

Aliluia.

Psaltët: Aliluia

Duke patur mitrën hyjpritëse, Virgjëresha nxitoi tek Elisabeta; dhe foshnja e saj, duke kuptuar menjëherë përshëndetjen e saj, gëzohej; dhe me kërcime, si me këngë, i thërriste Hyjlindëses:

Gëzohu, o hardhi prej lastari që nuk fishket; gëzohu, o arë fruti të përjetshëm.

Gëzohu ti, që kultivon bujkun njeridashës; gëzohu ti, që mbin mbjellësin e jetës sonë.

Gëzohu, o arë, që nxjerr pjellori mëshirash; gëzohu, o tryezë, që mban bollëk dhembshurish.

Gëzohu, se lulëzon livadhin e dëfrimit; gëzohu, se përgatit limanin e shpirtrave.

Gëzohu, o temjam i mirëpritur ndërmjetimi; gëzohu, o ndjesë e gjithë Botës.

Gëzohu, o mirëdashje e Perëndisë për njerëzit; gëzohu, o guxim i njerëzve përpara Perëndisë.

Gëzohu, o Nuse e panusëruar.

Psaltët: Gëzohu, o Nuse e panusëruar.

Duke patur përbrenda turbullim mendimesh të dyshimta, Josifi i urtë u shqetësua duke të parë të pamartuar e duke të kujtuar martesë-vjedhëse, o e Paqortueshme; po kur mësoi për ngjizjen tënde nga Shpirti i Shenjtë, tha:

Aliluia.

Psaltët: Aliluia

STANCA E DYTË

Barinj të dëgjuan engjëjt që himnonin ardhjen trupësore të Krishtit, dhe, duke rendur si tek një bari, e panë si qengj të panjollë, të kullotur në barkun e Marisë, të cilës, duke himnuar i thanë:

Gëzohu o Nënë qengji dhe bariu; gëzohu, o oborr dhensh të arsyeshëm.

Gëzohu, o mbrojtëse kundër armiqsh të padukshëm; gëzohu, o hapëse e dyerve të Parajsës.

Gëzohu, se qielloret gëzohen bashkë me tokën; gëzohu, se tokësoret vallëzojnë bashkë me qiejt.

Gëzohu, o gojë e paheshtur e Apostujve; gëzohu, o guxim i pamposhtur i Athloforëve.

Gëzohu, o mbështetje e fortë e besimit; gëzohu, o njohëse e shkëlqyer e hirit.

Gëzohu ti, me anën e së cilës u zhvesh Ferri; gëzohu ti, me anën e së cilës u veshëm me lavdi.

Gëzohu o Nuse e panusëruar.

Psaltët: Gëzohu, o Nuse e panusëruar.

Duke parë Yllin Hyjrendës, Magët i ranë pas dritës së tij; dhe duke e mbajtur si kandil, kërkonin me të mbretin e fortë; dhe duke e arritur të paarritshmin, u gëzuan, duke i thirrur:

Alilua.

Psaltët: Alilua

Bijtë e Kaldejve panë në duart e Virgjëreshës atë që gatoi me dorë njerëzit; dhe duke e njohur për Zot, megjithëse mori formë shërbëtori, vrapuan ta adhurojnë nëpërmjet dhuratave, e t'i thërrasin të Bekuarës:

Gëzohu, o nënë ylli të paperëndueshëm; gëzohu, o agim dite mistike.

Gëzohu ti, që shove furrën e gënjeshtërs; gëzohu ti, që ndriçon ata që hyjnë në të fshehtat e Trinisë.

Gëzohu ti, që nxore nga fuqia tiranin çnjerëzor; gëzohu ti, që tregove Krishtin, Zot njeridashës.

Gëzohu ti, që shpërblen nga feja barbarë; gëzohu ti, që shpëton nga balta e veprave.

Gëzohu ti, që pushove adhurimin e zjarrit; gëzohu ti, që çliron nga zjarri i pasioneve.

Gëzohu, o udhëheqëse e urtësisë së besimtarëve; gëzohu, o dëfrim i gjithë brezave.

Gëzohu, o Nuse e panusëruar.

Psaltët: Gëzohu, o Nuse e panusëruar.

Magët, duke u bërë predikues hyjprurës, u kthyen në Babilonë, duke kryer profecinë tënde e duke të predikuar ty, Krishtin, tek të gjithë, duke lënë si të marrë Irodhin që s' dinte të këndojë:

Alilua.

Psaltët: Alilua

Duke ndritur në Egjipt ndriçim të vërtetë, dëbove errësirën e gënjeshtërs; se idhujt e saj, o Shpëtimtar, ranë ngaqë nuk duruan fuqinë tënde; dhe ata që shpëtuan prej tyre, i thërritnin Hyjlindëses:

Gëzohu, o ringritje e njerëzve; gëzohu, o rënie e demonëve.

Gëzohu ti, që shkele mashtrimin e gënjeshtres;
gëzohu ti, që demaskove dinakërin e idhujve.

Gëzohu, o det, që përmyte Faraonin mendor;
gëzohu, o shkëmb, që ujite të eturit përjetë.

Gëzohu, o shtyllë e zjarhtë, që udhëheq ata që
ndodhen në errësirë; gëzohu, o strehë e botës, më e
gjerë se një re.

Gëzohu, o ushqim, pasardhës i mannës; gëzohu,
o shërbyese dëfrimi të shenjtë.

Gëzohu, o toka e premtimit; gëzohu ti, prej së
cilës rrjedh mjaltë dhe qumësht.

Gëzohu, o Nuse e panusëruar.

Psaltët: Gëzohu, o Nuse e panusëruar.

Kur Simeoni do të ikte nga jeta e tanishme
mashtroese, iu dhe në duar si foshnjë, por u njohe
prej tij si Perëndi i përkryer; prandaj u çudit për
urtësinë tënde të pashprehur, duke i thirrur:

Alilua.

Psaltët: Alilua

STANCA E TRETË

Krijesë të re na tregoi Krijuesi, ne që u krijuam
prej tij; duke lindur prej barku të pafarë dhe duke e

ruajtur ashtu siç ishte të pacënuar; që, duke parë çudinë, ta himnojmë, duke thirrur:

Gëzohu, o lule e paprishjes; gëzohu, o kurorë e vetëpërmbajtjes.

Gëzohu ti, që shkëlqen tipin e ngjalljes; gëzohu ti, që tregon jetën e Engjëjve.

Gëzohu, o pemë me frut të shkëlqyera, prej së cilës ushqehen besimtarët; gëzohu, o dru me gjethe që bëjnë hije të mirë, nën të cilën shumë vetë strehohen.

Gëzohu ti, që linde udhëheqës për të humburit; gëzohu ti, që linde shpërblyes për robërit.

Gëzohu, o zbutja e gjykatësit të drejtë; gëzohu, o falja e shumë fajtorëve.

Gëzohu, o veshje nga guximi i të zhveshurve; gëzohu, o dashuri që tejkalon çdo mall.

Gëzohu, o Nuse e panusëruar.

Psaltët: Gëzohu, o Nuse e panusëruar.

Duke parë lindje të çuditshme, le të bëhemi të huaj për botën, duke transferuar mendjen në qiell; se prandaj Perëndia i Lartë u shfaq mbi tokë si njeri i përlulët duke dashur të tërheqë tek lartësia ata që i thërrasin:

Alilua.

Psaltët: Alilua

I tëri ishte në të poshtmet, dhe nga të sipërmet s'u largua fare Fjala e papërshkrueshme; sepse u bë denjim hyjnor dhe jo lëvizje vendore; dhe lindje me Shpirt Perëndie prej Virgjëreshe, e cila dëgjon këto:

Gëzohu, o vend i Perëndisë së panxënshëm; gëzohu, o derë misteri të nderuar.

Gëzohu, o dëgjim i dyshimtë për të pabesët; gëzohu, o mburrje e padyshimtë për besimtarët.

Gëzohu, o qerre e tërëshenjtë e atij që rri mbi Keruvimet; gëzohu, o shtëpi e mirë shumë e atij që rri mbi Serafimet.

Gëzohu ti, që i bashkove në një të kundërtat; gëzohu ti, që lidhe virgjëri dhe lehoni.

Gëzohu ti, me anën e së cilës u zgjidh shkelja; gëzohu ti, me anën e së cilës u hap Parajsa.

Gëzohu, o çelës i mbretërisë së Krishtit; gëzohu, o shpresë e të mirave të përjetshme.

Gëzohu, o Nuse e panusëruar.

Psaltët: Gëzohu, o Nuse e panusëruar.

Tërë natyra e engjëjve u çudit për veprën e madhe të njerëzimit tënd; se shikonte të paafrueshmin Perëndi si njeri të afrueshëm për të gjithë, që rronte bashkë me ne dhe që dëgjon prej të gjithëve kështu:

Aliluia.

Psaltët: Aliluia

Oratorë shumëfolës i shohim si peshq të heshtur mbi ty, o Hyjlindëse; se nuk dinë të thonë se si edhe Virgjëreshë mbetesh, edhe të lindësh munde; por ne, duke admiruar misterin, me besim thërrasim:

Gëzohu, o enë e urtësisë së Perëndisë; gëzohu, o arkë e providencës së Tij.

Gëzohu ti, që i tregon filozofët të paditur; gëzohu ti, që demaskon mjeshtërit e fjalës të paarsyeshëm.

Gëzohu, se u marrosën biseduesit e fortë; gëzohu, se u fishkën autorët e miteve.

Gëzohu ti, që thyen thurjet e athinianëve; gëzohu ti, që mbush rrjetat e peshkatarëve.

Gëzohu ti, që nxjerr nga thellësia e padijes; gëzohu ti, që ndriçon shumë vetë në dije.

Gëzohu, o anije e atyre që duan të shpëtojnë; gëzohu, o liman i atyre që lundrojnë në jetë.

Gëzohu, o Nuse e panusëruar.

Psaltët: Gëzohu, o Nuse e panusëruar.

Duke dashur të shpëtojë botën, Bërësi i gjithçkaje erdhi tek ajo i vetëftuar; dhe duke qenë bari si Perëndia, për ne u shfaq njeri sipas nesh; se duke ftuar i ngjashmi të ngjashmin, dëgjon si Perëndi:

Alilua.

Psaltët: Alilua

STANCA E KATËRT

Kështjellë e virgjëreshave je, o Hyjlindëse Virgjëreshë, dhe e gjithë atyre që përikin tek ti; se Ai që bëri qiellin dhe tokën të bëri, o e Kulluar, duke banuar në mitrën tënde dhe duke i mësuar të gjithë të të thërrasin:

Gëzohu, o shtyllë e virgjërisë; gëzohu, o portë e shpëtimit.

Gëzohu, o kryetare e rigatimit mendor; gëzohu, o dhënëse e mirësisë hyjnore.

Gëzohu, se ti rilinde ata që u ngjizën turpërisht; gëzohu, se ti urtësove të plaçkiturit në mendjen.

Gëzohu ti, që shfuqizove prishësin e mendjeve; gëzohu ti, që linde mbjellësin e dëlirësisë.

Gëzohu, o thalam nusërimi të pafarshëm; gëzohu ti, që lidh besimtarët me Zotin.

Gëzohu, o rritëse e mirë e virgjëreshave; gëzohu, o nusestolisëse e shpirtrave të shenjta.

Gëzohu, o Nuse e panusëruar.

Psaltët: Gëzohu, o Nuse e panusëruar.

Çdo himn mposhtet kur përpiqet të zgjerohet sipas shumicës së mëshirave të tua të shumta; se, edhe në të blatofshim këngë aq sa rërë, o Mbret i shenjtë, nuk bëjmë asgjë të barazvlefshme për sa na ke dhënë neve që të thërrasim:

Alilua.

Psaltët: Alilua

Llambadhe dritëpritëse, që u shfaq për ata që ndodhen në errësirë, e shohim Virgjëreshën e shenjtë; se, duke ndezur dritën e palëndshme, i udhëheq të gjithë në dijen hyjnore, duke ndriçuar mendjen me agim dhe duke u nderuar me thirrje si këto:

Gëzohu, o rreze e Diellit mendor; gëzohu, o shigjetë e dritës së paperëndueshme.

Gëzohu, o vetëtimë që shkëlqen shpirtrat; gëzohu ti, që çudit armiqtë si gjëxim.

Gëzohu, se lind ndriçimin e shumëdritshëm; gëzohu, se buron lumin e shumëvëshëm.

Gëzohu ti, që pikturon tipin e kolivithrës; gëzohu ti, që heq njollën e mëkatit.

Gëzohu, vaskë që shplan ndërgjegjen; gëzohu, o krater që qeras ngazëllim.

Gëzohu, o aromë e erës së mirë të Krishtit; gëzohu, o jetë dëfrimi mistik.

Gëzohu, o Nuse e panusëruar.

Psaltët: Gëzohu, o Nuse e panusëruar.

Detyrimet e vjetra duke dashur të falë, borxhshlyesi i gjithë njerëzve, erdhi me anën e vetes së tij tek ata që u larguan nga hiri i tij; dhe duke grisur dorëshkrimin, dëgjon prej të gjithëve kështu:

Aliluia.

Psaltët: Aliluia

Duke kënduar lindjen tënde, të përhimnojmë të gjithë si tempull i shpirtshëm, o Hyjlindëse; se duke banuar në barkun tënd Zoti që i mban të gjitha në dorë, shenjtëroi, lavdëroi, dhe i mësoi të gjithë të të thërrasin:

Gëzohu, o tendë e Perëndisë dhe e Fjalës; gëzohu, o e Shenjtë, më e madhe se shenjtoret.

Gëzohu, o arkë e larë me ar prej Shpirtit; gëzohu, o thesar i pashpenzuar i jetës.

Gëzohu, o kurorë e çmueshme e mbretërve shpresëtarë; gëzohu, o mburrje e nderuar e priftërinjve të devotshëm.

Gëzohu, o fortesë e patundur e Kishës; gëzohu, o kështjellë e papushtueshme e mbretërisë.

Gëzohu ti, me anën e së cilës ngrihen trofera; gëzohu ti, me anën e së cilës rrëzohen armiqtë.

Gëzohu, o shërim i lëkurës sime; gëzohu, o shpëtim i shpirtit tim.

Gëzohu, o Nuse e panusëruar.

Psaltët: Gëzohu, o Nuse e panusëruar.

O Nënë e tërëhimnuar, që linde Fjalën, më të shenjtë se gjithë shenjtoret (*3 herë*); duke pritur blatën e tanishme, shpëtoi të gjithë nga çdo fatkeqësi dhe shpërblei prej Skëterrës së ardhshme ata që thërrasin bashkë:

Alilua.

Psaltët: Alilua

Tingull. T..IV. Ti Ipermaho Stratigo

Përlufteshës gjenerale këngët mundëse, si përhirim që e shpëtove prej tmerreve, qyteti yt po të përshkruan, o Virgjëreshë. Po sikurse ke fuqi të paluftuarshme, prej çfarëdo rreziku shpëtomë, se po të thërres: Gëzohu, o Nuse e panusëruar.

Shenjt Perëndi, Shenjt i fuqishëm, Shenjt i pavdekshëm, mëshirona *(3 herë)*.

Lavdi Atit e Birit edhe Shpirtit të Shenjtë; tani e përherë e në jetë të jetëve. Amin.

Trini e Tërëshenjtë, mëshirona; o Zot, fali mëkatet tona; o Zot i madh, ndjei paudhësitë tona; o i Shenjtë, vështro dhe shëro sëmundjet tona për emrin tënd.

Mëshiro, o Zot *(3 herë)*.

Lavdi Atit e Birit edhe Shpirtit të Shenjtë; tani e përherë e në jetë të jetëve. Amin.

Ati ynë që je në qiejt, u shenjtëroftë emri yt, ardhtë mbretëria jote, u bëftë dëshira jote, si në qiell ashtu edhe mbi dhe. Bukën tonë të përditshme jepna neve sot; dhe falna fajet tona sikurse edhe ne ua falim fajtorëve tanë; dhe mos na shtjer në ngasje, po shpëtona nga i ligu.

Prifti: Se jotja është mbretëria, dhe fuqia, dhe lavdia e Atit, e Birit dhe e Shpirtit të Shenjtë, tani e përherë e në jetë të jetëve.

Lexuesi: Amin.

Pastaj shkurtorja e ditës ose:

Përlufteshës gjenerale këngët mundëse, si përhirim që e shpëtove prej tmerreve, qyteti yt po të përshkruan, o Virgjëreshë. Po sikurse ke fuqi të paluftuarshme, prej çfarëdo rreziku shpëtomë, se po të thërres: Gëzohu, o Nuse e panusëruar.

Mëshiro, o Zot. *(40 herë)*

O Krisht, Perëndi që adhurohesh e lavdërohesh në çdo kohë e në çdo orë në qiell e mbi dhe, zemërgjerë, zemërdhembshur, mëshirëplotë, që do të drejtët dhe mëshiron mëkatarët, që i thërret të gjithë në shpëtim me zotimin e të mirave të pritme, ti o Zot, prit lutjet tona në këtë orë dhe drejto jetesën tonë sipas porosive të tua. Shenjtërona shpirtrat, pastrona trupat, ndreqna mendimet, pastrona mendjet dhe shpëtona prej çdo hidhërimi, të keqeje dhe helmi. Mbrona me engjëjt e tu të shenjtë që duke u ruajtur dhe duke u udhëhequr prej ushtrisë së tyre të arrijmë të baresim tek bashkimi i besës dhe tek njohja e lavdisë sate të paafruar, se i bekuar je në jetë të jetëve. Amin.

Mëshiro, o Zot (*3 herë*).

Lavdi Atit e Birit edhe Shpirtit të Shenjtë; tani e përherë e në jetë të jetëve. Amin.

Më të nderuarën se Keruvimet dhe më të lavdëruarën pa krahasim se Serafimet, që pa u cënuar linde Fjalën Perëndi, me të vërtetë Hyjlindësen, ty të madhërojmë.

Beko, o Atë, në emër të Zotit.

Prifti: Perëndia na përdëlleftë dhe na bekoftë, shfaqte fytyrën e Tij mbi ne dhe na mëshiroftë.

Lexuesi: Amin. Mëshiro, o Zot. (*3 herë*)

Dhe shpëtona, o Virgjëreshë e Tërëshenjtë.

Lutje Hyjlindëses së Tërëshenjtë (*Nga Pavli, murg i Manastirit të Evergjetit*)

E papikëluar, e papërlyer, e pacënuar, e panjollshme, Virgjëreshë e pastër, Zonjë Nuse e Perëndisë, që bashkove Fjalën Perëndi me njerëzit me lindjen tënde të çuditshme dhe mbështete natyrën e hedhur të gjinisë sonë me qiellorët; e vetmja shpresë e të dëshpëruarve dhe ndihma e të luftuarve; përkrahja e gatshme e atyre që rendin tek ti dhe strehë e gjithë të krishterëve; mos të ardhhtë ndot nga unë mëkatari, i mallkuari, që prisha tërë

veten time me mendime, fjalë dhe vepra të turpshme dhe që u bëra rob me dashje nga plogështia mendore e dëfrimeve të jetës; por si Nënë e Perëndisë njeridashës, me dashamirësi le të të vijë keq për mua mëkatarin dhe plangprishësin, dhe prit lutjen që të blatohet prej buzësh të ndotura; dhe lutju Birit tënd dhe mbretit e Zotit tonë, duke përdorur guximin tënd prej nëne që të ma hapë dhe mua zemrën njeridashëse të mirësisë së tij; dhe, duke mos vënë re fjalët e mia të panumërta, të më kthejë në pendim dhe të më bëjë punëtor të sprovuar të porosive të tij.

Dhe ji pranë meje gjithnjë, si mëshirëplotë, hirplotë dhe mirëdashëse; në këtë jetë mbrojtëse dhe ndihmëse e nxehtë, duke thyer sulmet e kundërshtarëve dhe duke më udhëhequr drejt shpëtimit; dhe në kohë të ikjes sime, duke u kujdesur për shpirtin tim të mjerë dhe duke dëbuar larg faqet e errëta të demonëve të ligj; dhe në ditën e frikshme të gjyqit shpëtomë nga Ferri i amëshuar dhe tregomë trashëgimtar të lavdisë së patregueshme të Birit tënd dhe Perëndisë tonë; të Cilin e paça, o Zonja ime, Hyj lindëse e përmbishenjtë, me ndërmjetimin dhe përkrahjen tënde me hirin dhe njeridashjen e Birit tënd të vetëmlindur, Zotit dhe Perëndisë dhe Shpëtimtarit tonë Jisu Krishtit; të Cilit i përket çdo lavdi, nder e adhurim, bashkë me Atin e tij të pafillim dhe Shpirtin e tij të Tërëshenjtë, të mirë e jetëbërës, tani e përherë e në jetë të jetëve. Amin.

Lutje Zotit tonë Jisu Krisht
(Nga Andiohu, murg i Pandhektit)

Dhe jepna, o Zot, neve që shkojmë për gjumë, prehje trupi dhe shpirti; dhe ruajna nga gjumi i errët i mëkatit dhe prej çdo epshi të errët të natës. Pusho hovet e pasioneve, shuaj shigjetat e zjarra të të ligut që lëvizin kundër nesh dinakërisht; thyej kryengritjet e trupit tonë dhe vër në gjumë çdo mendim tokësor e lëndor. Dhe dhurona, o Perëndi, mendje vigjëluese, mendim të urtë, zemër esëll, gjumë të lehtë dhe pa ndonjë fantazi satanike. Dhe zgjona në kohë të faljes, të mbështetur në porositë e tua e duke pasur në veten tonë kujtimin e pathyer të gjykimeve të tua. Falna lavdërimin tënd tërë natën, që të himnojmë, të bekojmë e të lavdëroj më emrin tënd të gjithënderuar e madhështor, të Atit e të Birit dhe të Shpirtit të Shenjtë, tani e përherë e në jetë të jetëve. Amin.

E përmbilavdëruar, gjithmonëvirgjër, e bekuar Hyjlindëse, dërgoja faljen tonë Birit tënd dhe Perëndisë tonë lypi që të shpëtojë me anën tënde shpirtrat tanë.

Shpresa ime është Ati; streha ime është Biri; mbrojtja ime është Shpirt i Shenjtë; Trini e Shenjtë, lavdi më Ty.

Gjithë shpresën time e vë tek ti o Nënë e Perëndisë; ruajmë nën mbrojtjen tënde.

Prifti: Lavdi më Ty, o Krisht Perëndi, shpresa jonë, lavdi më Ty.

Lexuesi: Lavdi Atit e Birit edhe Shpirtit të Shenjtë, tani e përherë e në jetë të jetëve. Amin.

Mëshiro, o Zot. (3 herë) Beko, o Atë i shenjtë.

Prifti: Krishti Perëndia ynë i vërtetë, me ndërmjetimet e Nënës së Tij të pacënuar dhe krejt të papërlyer, të nderuarit, të lavdëruarit Profet, Pararendësit dhe Pagëzorit Joan; të Apostujve të shenjtë, të lavdëruar e të dëgjuar; të Martirëve të shenjtë, të lavdëruar dhe mundës të shkëlqyer; të Etërve tanë oshënarë dhe hyjprurës; (të shenjtit të kishës) të Hyjprindërve të shenjtë e të drejtë Joakim dhe Ana, të shenjtit (të ditës) që lusim sot dhe të gjithë shenjtorëve, na mëshiroftë dhe na shpëtoftë si Perëndi i mirë, njeridashës dhe mëshirues.

Lexuesi: Amin.

Pastaj prifti thotë këto urata si më poshtë dhe populli, përgjigjet çdo herë: Mëshiro, o Zot.

Prifti: Le të lutemi për paqen e botës.

Për të krishterët besëmirë dhe orthodhoksë.

Për Kryepiskopin tonë (*aksh*) dhe për tërë
vëllazërinë tonë më Krishtin.

Për etërit dhe vëllezërit tanë të jetëndërruar.

Për ata që na shërbejnë dhe për ata që na kanë
shërbyer.

Për ata që na urrejnë dhe për ata që na duan.

Për ata që na porositën ne të pavyerit të lutemi
për ta.

Për çlirimin e robërve.

Për mirëlundronjësit e deteve.

Për të dergjurit në sëmundje.

Për plotësinë e pemëve të dheut.

Për të gjithë të krishterët orthodhoksë, që prehen
me shpresë këtu e kudo.

Le të themi dhe për veten tonë.

Mëshiro, o Zot. (*3 herë*)

Psaltët psalin ngadalë troparin:

Tingull. III. Tin Oreotita.

O bukuri me nam, o virgjëri pa cen, o drit' e
diellit, o hën' e qiellit. Shën Gabrieli kur të pa, çuditej
dhe të thërriste: Si të të lavdëroj, o Mari Hyjlindëse.
Ç'këngë të këndoj për Ty, nuk e di dhe kërkoj më
kot. Pra them sikundër jam porositur: Gëzohu,
Virgjëreshë Hirplotë.

Prifti: Me uratat e Etërve tanë të shenjtë, o Zot Jisu Krisht Perëndi, mëshirona dhe shpëtona.

Psaltët: Amin.